


Kasano nga usaren ti Leaf Color Chart (LCC)

[Panagabuno]

Ti Leaf Color Chart (LCC) ket maysa a wagas a pangrukod no agkasapulan iti nitroheno ti pagay wenno saan. Nalaka ken alisto nga usaren gapu ta addaan daytoy iti uppat nga agduduma ti kaberdena a tawa a pangidasigan ti kolor ti bulong iti pagay. Ti Numero 2 iti LCC (kapusyawan a berde) ipakitana ti kababaan a lebel ti nitroheno iti pagay idinto ti Numero 5 (ngumisit a berde) isu ti kangatuan.



Dagiti Addang iti Panangusar:

Linawas nga ag-LCC manipud 14 nga aldaw kalpasan ti panagraep (AKR) wenno 21 nga aldaw kalpasan ti panagsabog (AKS) agingga iti panagsabong. Ngem no nagpondo iti 14-14-14-12S iti ika-14 AKR wenno 21 AKS (kitaen iti Listaan 2 ken 3), rugian ti panag-LCC maysa a lawas kalpasanna (21 AKR wenno 28 AKS). Ikiwar ti maysa gramo kada metro kuadrado a $ZnSO_4$ iti pagbunubonan maysa nga aldaw sakbay ti panagbunubon.

1. Mangpili iti 10 a puon ti nalapsat a pagay iti talon.
2. Pilien ti nasalun-at, kangatuan, ken nakaukrad a bulong iti kada puon iti napili a mula. Idasig ti color ti tengnga a parte ti bulong kada tawa ti LCC. Pilien ti kaasitgan a kaasping a kolor ti bulong iti LCC. Saan nga isina ti bulong ken saan nga isarang ti LCC iti init bayat ti panagidasig. Maysa laeng a tao ti masapul a mangaramid ti panagidasig iti kada iskediul ti *LCC reading*. Aramiden daytoy manipud alas 8-10 ti bigat.
3. No ad-adu ngem 5 kadagiti 10 a bulong nga indasig ket nababbaba ngem Numero 4 (para kadagiti inraep) ken Numero 3 (para kadagiti insabog), agabono iti 1.5 sako a urea wenno 3 sako nga ammonium sulfate kada ektaria no panawen ti kalgaw ken 1 sako a urea wenno 2 sako nga ammonium sulfate kada ektaria no panagtutudo. No nagpondo iti 14-14-14-12S, saan nga agusar iti ammonium sulfate gapu ta umdasen ti sulfur a naipondo.
4. Uliten ti panagidasig iti kada 7 nga aldaw agingga ti panagsabong.